

Gerah heist ein Wanderspennung / dabey wir erinnert werden / das wir rechte Wanderer vnd Pilgers Leute sein / darumb wir keine mühe noch vnkost sparen sollen / ins heilige Land gen Jerusalem / zur waren Kirche Gottes zu wandern / darinn die schönen Ehren Pforten / durch welche REX GLORIAE der König der Ehren einzeucht / nemlich sein Wort vnd Wunderzeichen / zu besichtigen / denn allda eine gute beystewr / elne reiche Zehrung zu finden ist / mit welcher wir durch den Jammerthal reysen / vnd wenns zeit ist mit Fried vnd Frewden in das newe Himische Jerusalem heim wandern können. Zu welchem der Prophet Esaias Cap. 2. vermahnet vnd spricht: Kompt laßt vns auff den Berg des HEERN gehen / zum Hause des Gottes Jacob / das er vns lehre seine Wege / vnd wir wandeln auff seinen Steigen.

Mehr Exempla Progresionum seind hie vnnötig / wollen nun die Regulam detri zuhanden nemen.

REGVLA DETRI.

Regula Detri, auch Regula proportionum, Item die güldene Regel genant lehret / durch drey bekante Zalen / die vierde vnd vnbekante Zal suchen vnd erkündigen. In solcher Ordnung / das man die Frage hinten an / vnd was der Frage im Namen gleich ist / vornen an / vnd die dritte Zal in die mitten stellet. Nach solcher Ordnung sol man die mittel vnd dritte Zal mit einander Multiplieiren / vnd was darauff kompt durch die förderste Zahl theilen. So wirdt durch die gefunden Zal im Quotienten auff die Frage bericht gegeben / wie solches in vielen Künstlichen Rechenbüchern / nach der lenge erkleret / auch mit mancherley vortel vnd behendigkeit zu verrichten / gelehret wirdt.

Nachdem dann in dieser Arithmetica die Ebreische Römische vnd Griechische Münze / allermeist auff Kronen vnd Thaler /